

LA USC DI LADINS - VENERDI' 6 DICEMBRE 2019

PUBBLICAZIONS

I fondamenc de noscia tradizions

L frut de passa 40 egn de studies e enrescides de l'antropologh Cesare Poppi ne met dant la reijes, i confront, la testimonianzes e la interpretazions de la cultura populèra de noscia tera

La inaudazion del secondo cors de auta formazion Antropolad stada enstadi te Fascia l'è stat l'ocajon per prejentèr na neva publicazion che costituesc n pilèster emportant per la cognoscentia de la cultura populèra e de la tradizions de Fascia e de la valèdes vejines.

Se trata del prum de trei volumes che regoi la enrescides, la testimonianzes e la interpretazions

fones de l'antropologh Cesare Poppi. Materièi che da egn spetèa de vegnir publiché a na vida organica, per meter a la leta passa 40 egn de studies su la cultura populèra ladina.

«N muie de outes te chisc egn me è stat domanà de i publichèr – à dit l'autor – ma me saea n lurier massa encomper, che no me sentie de fèr, pissan che fosc no paèa la speisa.»

Enveze segur paèa la speisa, ma nience ti ambienc academics de l'Inghiltera, olache Poppi se à spialisà e l'è stat dozent per n muie de egn, i è stac bogn de l convenjer.

A la fin l'obietif l'è stat arjont de gra a l'empegn de doi persones: l diretor de l'Istitut ladin Fabio Chiocchetti, che l'è stat compagn de Poppi ti egn de l'università e fa zile ence la rejon che à portà l'antropologh da Bologna a se enteressèr de la cultura populèra ladina, e l joen antropologh furlan Davide Ermacora, doventà amich de Poppi, che à fat l gran lurier de binèr ensema e rencurèr i scric.

Poppi endèna la prejentazion l'à reingrazià chesta doi persones, ma dant amò l'à reingrazià e recordà duc i testamonesc fascegn che ge à

permetù de portèr inant sia enrescides ti egn'70, soraldut ta Penia.

Chest liber dal titol «Saggi di antropologia ladina e alpina», che fèsc pèrt de la colana de l'Istitut cultural ladin 'Studies e enrescides', ne sporc i strumenc per cognoscer la reijes storiches, i confront geografics, la testimonianzes en pruma persona e la interpretazions fones e ascortes di aspec più segnificatives de la cultura populèra de noscia tera.

«L'è n strument – à dit l diretor Fabio Chiocchetti – pissà prum de dut proprio per i dozent de la Scola ladina, percheche i posse se emprevaler de chest patrimoni e l passèr inant a na vida adatèda ai desvalives livie de scola a la generazioni che vegn dō, cheles che arà te man l destin del patrimoni linguistich e culturèl de noscia comunanza.»

Paroles de salut e de compliment per chesta neva publicazion è ruèdes ence da man del diretor del cors Antropolad Paul Videsott, de la Sorastanta Mirella Florian e del diretor del Museo etnografich de Sèn Micel Giovanni Kezich, che l'à



Fabio Chiocchetti, Cesare Poppi, Mirella Florian, Davide Ermacora e Paul Videsott a la prejentazion del liber.

rejonà de na publicazion emportanta, che mencià e che joarà a la comunanza ladina e a duc chi che se cruzia de antropologia alpina.

Chest gran liber de passa 400 piates l'è, descheche aon dit, demò l prum di trei volumes che regoi duc i studies de Poppi e l'è dedicà a la narativa

orala e la raprezentazions. L secondo, che vegnarà fora tel meis de firé, l sarà dut dedicà al Carnascèr e la ritualità e per l'istà del 2020 l'è en previjion n terzo volum sui aspec storich-soziologics, la cultura materièla e l tem de l'identità.

Lucia Gross